

欽
定
全
唐
文

欽定全唐文卷二百八十六目錄

新文豐出版社藏書

張九齡

四

敕安西節度王斛斯書

敕安西節度王斛斯書

敕北庭經略使蓋嘉運書

敕瀚海軍使蓋嘉運書

敕四鎮節度王斛斯書

敕四鎮節度王斛斯書

敕安西節度王斛斯書

敕北庭都護蓋嘉運書

敕瀚海軍使蓋嘉運書

敕契丹知兵馬中郎李過折書

敕突厥苾伽可汗書

敕突厥可汗書

敕劍南節度王昱書

敕突厥登利可汗書

敕突厥可汗書

敕突騎施毗伽可汗書

敕突厥可汗書

敕突厥可汗書

敕突厥可汗書

敕吐蕃贊普書

敕磧西支度等使章仇兼瓊書

敕金城公主書

欽定全唐文卷二百八十六

張九齡

四

敕安西節度王斛斯書

敕王斛斯吐蕃與我盟約歃血未乾已生異心遠結凶黨而甘言緩我欲待合謀連衡若成西鎮何有卿能先覺有以待之觀釁而行適是軍法且屯苗旣受踐暴軍人亦被拘囚如李混之所言不反何謂然則此蕃姦計頗亦陰澁外示存約內實伺便事儻不濟卽云無負卿還須知其變詐隨事交當使其退不得以此爲詞進不得成其凶計如

此設拒乃爲上策若事已侵軼兵見交鋒卽當率勵驍雄
盡敵乃已秋冷卿及將士已下並平安好遣書指不多及

敕安西節度王斛斯書

敕王斛斯卿在西鎮軍務煩勞皆能用心處置不失頃與
突騎施攻戰歷涉三年降虜生俘所獲過當懸軍能爾朕
甚嘉之行官已有賞勞在卿固合優獎今授卿重職兼彼
領護且復裒進終爲後圖吐蕃此來意不徒爾所有計較
前已略言先覺預防無能爲也萬里之外三軍之宜一以
委卿勿失權斷秋後漸冷卿及將士已下並平安好遣書

指不多及

敕北庭經略使蓋嘉運書

敕蓋嘉運卿久在邊鎮庶事用心又去年出兵冒遠入賊
諸下皆賞卿豈無功言念忠勤不忘裒進今授卿雄要仍
兼舊官宜知朕心當重寄也突騎施雖請和好其意不真
近敕彼軍與天山計會當審觀事勢遠著候人若有形勢
事資先據如無應會不可虛勞勢在臨時固難遙斷秋後
漸冷卿及將士已下並平安好遣書指不多及

敕瀚海軍使蓋嘉運書

敕瀚海軍使北庭都護蓋嘉運突騎施凶逆犯我邊陲自
夏以來圍逼疎勒頃得王斛斯表見屯邊城張羲之等入
據此城屢與之鬪將士效節逆虜破傷已不敢攻圍而頓
兵不去但邊城糧少或爲其所知持久則難不可不早爲
計也卿可簡練驍武揚聲大入仍有所保據以防不虞用
解邊城之圍以挫逆賊之勢臨機適變委卿裁之仍與王
斛斯審籌形勢取萬全也今故令內謁者監王尚客往一
一口具冬中甚冷卿及將士已下並平安好遣書指不多
及

敕四鎮節度王斛斯書

敕四鎮節度副大使安西副大都護王斛斯及將士已下
萬里懸軍屬此狂寇屢有攻戰能挫凶威遠聞義勇孰不
增氣卿等激勵將士爲國盡誠決命寇讐成名當代奇功
壯節何謝古人矢石之間見危致命良深嗟嘆重其忠烈
又聞朱惠中箭令復何似善須救療使得不死前令具奏
陣亡將士欲加褒贈卿宜識此意卽以實聞近日與賊交
鋒臨陣殺敵事須優賞亦卽奏來所云賊等請和仍尚頓
兵北嶺此虜姦詐首尾百端外示求和內將誘我卿所防

慮皆中其心然則蓋嘉運北庭近亦深入頗有所獲想彼知之虜庭乍聞當合驚駭務須分兵守境諸處防虞烏合之胡豈堪勞役必將自潰勢亦不久蘇祿儻或覺此革心請和亦復量宜以時開納仍與嘉運計會必取良圖近所加兵且應支用臨事制變豈待言之今將緋紫袍各二十領若有殊功應須速賞並委卿量事賜之冬中極寒卿及將士已下並平安好遣書指不多及

敕四鎮節度王斛斯書

敕四鎮節度副大使安西副大都護王斛斯蘇祿念我大

惠敢作寇讐屢犯邊城將肆其惡雖禽獸是似而天地不容卿等義心固所發憤朕已敕河西節度使牛仙客令河西於諸軍州及在近諸軍簡練驍健五千人並十八年應替兵募五千四百八十人卽相續發遣卿可與蓋嘉運計會取彼道便隨事進討使此賊救首救尾形勢分離本旣烏合勞則自潰若以計取可不戰而擒若守而不攻益爲後患卿彼諸將皆是舊人旣諳山川又能料敵兼與北庭並力事亦可圖無爲端然連年受弊所緣邊鎮要切委卿臨事籌之可與蓋嘉運審量勿爲彼此之計也所緣兵募

行賜則令所由支遣已別敕牛仙客訖四鎮蕃漢健兒並委卿隨所召募可得幾許仍具數奏聞史震襲父可汗卽令彼招輯兼與卿計會並臨事處置無失所宜冬中甚寒卿及將士已下並平安好遣書指不多及

敕安西節度王斛斯書

敕王斛斯累得卿表知賊等肆惡終冬不去又聞將士與鬪數有殺傷諸胡攜離將自此始朕比爲料亦以爲然卿受寄遠方悉心奉國撫巡將士皆得輸誠萬夫一心以少擊眾雖有狂寇固無遠憂朕所懸官爵惟賞忠義苟能盡

節亦豈忘功卿可慰勉將士知朕此意若有殊效卽具狀以聞且蘇祿凶徒本是烏合今其師老必有怨嗟至如骨咄王子來投已是其效何國胡不受處分亦是明徵其下離心已至於此可令閒諜更誘其餘此賊敗亡將從內潰且四鎮絕遠皆是孤軍卒欲益兵頗難救急近已敕牛仙客且送五千人其餘驍勇亦卽繼發並救北庭計會卿可與蓋嘉運相知張皇國威誠在此舉俘滅醜虜今也其時勉樹邊勲以成不朽冬中甚寒卿及將士比並如何遣書指不多及

敕北庭都護蓋嘉運書

敕北庭都護蓋嘉運近得卿表知舊疾發動請入都就醫欲遂來表慮有邊要萬一失便雖悔何追且蘇祿猖狂方擬肆惡邊城經冬不去西州近復燒屯亦有殺傷想所聞也此賊諸頭抄掠虜眾已疲亦無能爲正可取便至如西州近者有賊其數無多烽候若明密與兩軍作號首尾邀擊立可誅翦何爲當軍自守信賊公行來有損傷去無關鍵豈是邊鎮之意也且西庭雖無節度受委固是一家有賊共除有患相救萬里之外何待奏聞自此之後必須用

意今遣醫人將藥往可善自將療春初餘寒卿及將士並平安好遣書指不多及

敕瀚海軍使蓋嘉運書

敕瀚海軍使北庭都護蓋嘉運及將士已下蘇祿爰自今夏連犯西陲犬羊之羣屯結不散誠欲出其不意乘虛以入凶黨聞此必自解圍卿識朕心有符成料比王尚客至聞已出師窮冬絕漠荷戈冒險又聞有所擒獲張我國威言念忠誠良深賞嘆在此行也四鎮狂虜必應抽退彼既有效應合敘勞兼云擒獲人當優賞宜具實狀一一以聞

然此賊爲惡勢將未已若困窮感實則不知安西近亦加兵卿彼士馬自足可與王斛斯計議逐要圖之春初餘寒卿及將士已下並平安好遣書指不多及

敕契丹知兵馬中郎李過折書

敕契丹知兵馬中郎李過折等卿比在蕃中已知才略一此行事十倍所聞旣立殊勲又成大節何其壯也可突于狡算翻覆人面獸心事其酋長不忠不義處其種落無信無恩專持兩端隨事向背而屈烈愚蔽與之同惡卿比觀變實爲遠圖誅元凶而存一蕃行權宜而合正道所全者

大所慮實深今諸部怙然皆卿之力也且頃者攜叛又甚
崎嶇羊馬不保於孳生田疇不安於耕種寄命山谷並力
干戈總由頑凶致此勞苦向若無卿此舉信彼所行以疲
弊之殘人當驍雄之巨眾彼則朝夕奔命此方歲月攻守
而眾寡不敵殲滅有期賴卿先見之明遽爲轉禍之計以
救萬人之命以成萬代之名豈獨大功眞爲上智今將疇
其井賦異姓封王以旌厥庸且有後命在彼初有變故乍
應驚擾百姓旣知想當安怙卿可與張守珪量事處置務
逐便宜今旣一家愛同赤子惟其所欲隨事撫存春初尚

寒卿及衙官刺史縣令並百姓已下並平安好遣書指不多及

敕突厥苾伽可汗書

敕突厥苾伽可汗比數有信知彼平安良足慰也自爲父子情與年深中間往來親緣義合雖云異域何殊一家邊境之人更無他慮甚善甚善此是兒可汗能爲承順副朕之所親厚人閒恩好無以過之長保此心終享福祿子孫萬代豈獨在今比秋氣漸冷卿及平章事首領部落並平安好遣書指不多及

敕突厥可汗書

敕兒登利突厥可汗天不福善禍終彼國苾伽可汗頃逝聞以惻然自二十年間結爲父子及此痛悼何異所生又聞可汗繼立蕃落並得寧靜良深悲慰且知無他朕與可汗先人情重骨肉亦旣與朕爲子可汗卽合爲孫以孫比兒似疎少許今修先父之業復往時之好此情更重只可從親若以爲孫漸成疎遠故欲可汗今者還且爲兒義結旣深當熟思此意人情終始固亦可知葬事所須並依來請卽與弔祭使將往必令及期言念宿昔深懷感愴春初

猶冷可汗及平章事與首領部落並得如宜遣書指不多及

敕劔南節度王昱書

敕劔南節度使益州長史王昱近得卿表知蒙歸義等效命出力自討西蠻彼持兩端宜其殘破苟非生事定是輸忠亦卿等指麾更張遠略諸部所請朝貢及蒙歸義等立功並委卿料若合行賞豈有不來時尚炎蒸路且修阻郵傳之弊公私可知亦云重勞非是有惜想卿臨事思其所宜緣蠻落初寧當須計議若欲入奏亦任暫來春晚極暄

卿比如宜遣書指不多及

敕突厥登利可汗書

敕突厥登利可汗日月流邁將逼葬期悲慕之心何可堪
處朕以父子之義情與年深及聞宅兆良以追悼前哥利
施頡斤至所請葬料事事不違所以然者將答忠孝故喪
紀之數禮物有加道之所存地亦何遠今又遣從叔金吾
大將軍佺持節弔祭兼營護葬事佺宗室之長信行所推
欲達其情必重其使以將厚意更敦前約且以爲保忠信
者可以示子孫息兵革者可以訓疆場故遣建碑立廟貽

範紀功因命史官正辭朕亦親爲篆寫以固終始想體至
懷春初尚寒可汗及平章事部落並平安好遣書指不多
及

敕突厥可汗書

敕兒突厥可汗朕與先可汗結爲父子及兒紹續情意日
深至於國計亦欲無別兒去年東討雖有先言然兩蕃旣
歸國家亦卽不合侵伐朕旣與兒無閒終不以此爲懷契
丹及奚諸蕃窮者土地不足以放牧羊馬不足以貪求遠
勞師徒兼冒鋒鏑勝不爲武不勝亦危以此言之當務其

大者突騎施本非貴種出自異姓惟任姦數誑誘羣胡十數年間又承國家庇廕因其荒遠遂得苟存近日以來敢茲背德又知兒意亦欲破之前與先可汗舉哀其使不肯就哭當時辭拒彼使具知兒若總兵西行朕卽出師相應安西瀚海近已加兵欲以滅之復何難也儻事捷之日羊馬土地總以與兒子女玉帛別有優賞信是長策可熟思之與兒情親故言及此耳今有少信物至宜領取春初尚寒兒與平章事首領百姓已下並平安好遣書指不多及

敕突騎施毗伽可汗書

敕突騎施毗伽可汗天地有正位鬼神有正主敢此違犯
必有禍殃不信朕言但試看取可汗雖爲君長實在幽荒
陰陽之氣偏僻如此縱欲自大其如天何往年可汗初有
冊立以我國家常爲勢援諸蕃聞此不敢動搖是我有大
惠於可汗行陰德於彼國自爾以後二十餘年情義相親
結爲父子可汗身自不覺豈不知彼之大援而戎俗少義
見利生心故闕俟斤入朝行至北庭有隙因此計議卽起
異心何羯達所言卽是彼人自告蹤跡已露然始行誅邊
頭事宜未是全失朕以擅殺彼使兼爲罪責北庭破劉渙

之家仍傳首於彼可汗縱有怨望亦合且有奏論朕若不
依舉兵未晚而乃總無來狀卽起凶謀侵我西州犯我四
鎮連年累月馬死人亾於羣胡已聞怨嗟於國家豈能大
損中間使哥德都耽及安胡數半泥臨河來此求和朕亦
信受故遣使相逐具宣往意其後審觀形勢全是詐欺故
密敕半道令迴豈是元心有負自爾之後侵犯不絕可汗
有何兵眾遂此憑陵諸國聞此豈不得計約算已西諸國
未敵我一兩大州可汗亦應先知何煩遂爾爲惡況安西
北庭將士皆是鐵石爲心可汗具諳不煩更道此則承前

輕舉彼自無義却以我爲失無乃重其過乎可汗向若有禮以理論奏闕俟斤下羊馬數雖稍多欲爲補答亦何足難惟費一州庸調酬還則已大多而乃無義爲讐暴我邊鎮孤城小堡倉卒見危大率而言其數非少彼若計索馬價我亦須得此物忝是有識之類可不自解思量又可汗正爲寇敗闕伊難如從我界過葱嶺捕獲並物奏來所有蕃書具言物數朕皆送還贊普其中一物不留可汗亦以此爲詞謂言朕留此物且蕃中貧薄所見不廣銀瓶香子將作珍奇黑毯赤縻亦爲好物我中國雖在貧下固不以

此爲貴可汗宜識此意勿妄生詞且闕伊難如越界可汗復邊頭作梗如此不捉更捉何人適是邊軍明其用命觀可汗求和之意似未有真心只擬誘引國家乘便取利如此等事何用爲之我國守信如天終不欺物謂天無信物自無知然於四時終不差也可汗若遂能爲惡朕當別有處分三二年內試看若爲必其自省前非更思恩舊朕卽棄捨大過父子如初可汗更有何憂百姓皆得安樂一任可汗自料朕亦不復多言一一在使者口具秋中漸冷可汗及公主衙官纛官首領百姓並平安好遣書指不多及

敕突厥可汗書

敕兒可汗比來和市常有限約承前馬數不過數千去歲以兒初立欲相優賞特勒欲谷前至納馬倍多故總與留著已給物市買中間蘇農賀勒兼領堅昆馬來朕以一年再市舊無此法哥解骨支去日丁寧示意又移健達干後到亦以理報知不遣重來須存信約遂乃不依處分驅馬直來無禮無信是何道理朕緣兒義重淡爲含容論其無知豈能不怪計兒忠孝必無非理未委此等何故而然念其遠來磧路艱苦勒今却退去似不相親令覲都賜蘇農

賀勒下及堅昆使下總二萬匹絹任其市易想兒知之其馬今並勒令却去至彼之日以理告示也夏末甚熱兒及平章事並平安好遣書指不多及

敕突厥可汗書

敕兒突厥可汗道路既遠使命復稀近日已來音信斷絕朕每多懸念想所知之與兒情義既深庶事無閒父子之國直往直來何異一家真無別也蘇農賀勒處刺達干等去歲將馬其數倍多又有諸蕃馬來亦是兒所發遣往者先可汗在日每年約馬不過三四千匹馬既無多物亦易

辦此度所納前後一萬四千緣兒初立可汗朕又約爲父子恩義相及不可却迴所以總留計物五十萬匹兼屬國家大禮並放天下租庸用度無窮非特和市緣此馬價通容稍遲處刺達干未還不是故爲留滯念悉此意當復寬心今見續續市易不久望了卽當發遣回日非賒在此還如當家去住亦何異也此後將馬來納必不可多還如先可汗時約有定準來交易發遣易爲事須久長不是限隔今故令趙惠琮往並有少信物別具委曲至宜領取秋氣漸冷兒及平章事首領百姓並平安好遣書指不多及

敕突厥可汗書

敕突厥兒可汗內侍趙惠琮從彼還一一口具深慰遠懷
兒表中猶言前年退馬多兼云蘇農賀勒處羅達干三年
在此與兒更無閒外庶事一家所以趙惠琮去時皆以實
報今者來報尚未體悉且去年所將馬來前後數倍常歲
至於好惡未必皆以兒知其中老弱病患及軀格全小不
堪駕馭如何總留所以略簡多少仍是十退一二在於兒
處大爲存情何故來章尚嫌多退必若留售惡馬亦恐諸
蕃笑人兒旣君長北蕃復與朕爲父子須存分義使遠近

知之勿信下人專由利動蘇農賀勒處羅達干等續續市
買甚有次第雖校遲少許物並好於往時不久當迴亦勿
怪也所欲遣使來者既爲父子之國來往乃是尋常須知
平安復申朝覲佇聞來使用慰朕心冬中極寒兒及平章
事首領百姓並平安好所有委曲皆使至口具遣書指不
多及

敕吐蕃贊普書

皇帝問贊普緣國家先代公主既是舅甥以今日公主卽
爲子壻如是重姻何待結約遇事足以相信隨情足以相

親不知彼心復同然否近得四鎮節度使表云彼使人與突騎施交通但蘇祿小蕃負恩逆命贊普既是親好卽合同嫉頑凶何爲却與惡人密相往來又將器物交通賂遺邊鎮守捉防遏是常彼使潛行一皆驚覺夜中格拒人或死傷比及審知亦不總損所送金銀諸物及偷盜人等並付悉諾一作付悉諾勃藏却將還彼旣與贊普親厚豈復以此猜疑自欲坦懷略無所隱縱通異域何慮異心又西南諸蠻元是異類或叛或附恍惚無常往年被略彼蕃率種歸我緣李知古處置失所又卽翻然改圖彼此之間有何定

分而彼有來者乃云此先舉兵以蠻爲詞未知孰是今旣無外當以此思之緣彼州鐵柱前書具報一言不信朕豈厚誣更以相仍便非義也鐵柱書唐九徵所作百姓咸知何不審之徒勞往復至於邊將在遠下人邀功變好爲惡誠亦有此非獨相規亦當自誠如此覺察更有何憂萬事之間一無所限隔所以細故無不盡言想所知之體至懷也晚春極暄贊普及平章事首領並平安好有少信物別具委曲遺書指不多及

敕磧西支度等使章仇兼瓊書

敕磧西支度營田等使兼知長行事殿中御史章仇兼瓊
近聞卿手足風緩頗有所廢而不敢言病竭心在公良用
嗟稱有古人之節西庭既無節度緩急不相爲憂藉卿使
車兼有提振不獨長行轉運營田而已事務方劇氣候又
偏將攝之閒自須得所今遣醫人將藥就彼看療可與之
商量隨病所宜冬寒卿比平安遣書指不多及

敕金城公主書

敕金城公主異域有懷連年不捨骨肉在愛固是難忘彼
使近來且知安善又聞贊普情義是事叶和亦當善執柔

謙永以爲好前後所請諸物其中色種不違仍別有條錄
可依領也春晚極暄想念如宐諸下並平安好今今內常
侍竇元禮往遣書指不多及

欽定全唐文卷二百八十七目錄

張九齡

五

敕吐蕃贊普書

敕吐蕃贊普書

敕吐蕃贊普書

敕吐蕃贊普書

敕金城公主書

敕吐蕃贊普書

敕金城公主書

敕吐蕃贊普書

敕西州都督張待賓書

敕河西節度副大使牛仙客書

敕天山軍使張待賓書

敕護密國王書

敕護密國王書

敕識匿國王書

敕勃律國王書

敕諸國王葉護城使等書

敕麗賓國王書

敕日本國王書

敕西南蠻大首領蒙歸義書

敕柘靜等州首領書

敕西南蠻大首領蒙歸義書

敕蠻首領鐸羅望書

敕安南首領爨仁哲等書

張守珪奏裨將安祿山失利送戮京師批

南郊赦書

東封赦書

后土赦書

藉田赦書

欽定全唐文卷二百八十七

張九齡

五

敕吐蕃贊普書

皇帝問吐蕃贊普近竇元禮往事具前書贊普後來亦知
彼意朕推心天下皆合太和況於彼蕃復是親婭仍加結
約盟誓再三以至道言之此亦仁義不薄也而贊普且猶
未信復是何心君長大蕃固不容易所云去年七月嶺州
將兵抄掠兼有詐誘嶺州之外尚隔諸蠻旣背吐蕃自行
寇抄掠而乃推托於我何爲遙信虛詞且西南羣蠻別是

一物既不容於我亦不專於吐蕃去卽不追來亦不拒乃是兩界所有只合任其所歸自數十年來或叛或附皆所親見豈假縷言往者此蠻背恩侵我邊鄙昆明卽舊州之故縣鹽井乃昆明之本城今復舊疆何廢修築而云除却是何道理且邊境備守彼此常事今旣和好何有嫌疑至如西自蔥嶺已來沿邊諸處或地勢是要或水土是好彼有城鎮亦皆內侵朕旣不解廣求更以自益緣已和好不可細論且八疊山築城置鎮皆入漢界何曾以此爲言而彼卽生詞未知何意邊城委任當擇忠良無信小人令得

閒構夏中已熱贊普及平章事部落百姓並平安好遣書指不多及

敕吐蕃贊普書

皇帝問贊普自與彼蕃連姻亦已數代又與贊普結約於今五年人使往還未嘗有閒朕以兩國通好百姓獲安子孫已來坐受其福疆場之事幸且無憂此雖境上有兵固是存而不用在彼邊事與此何殊近得來章又論蠻中地界所有本末前書具言贊普不體朕懷乃更傍引遠事若論蠻不屬漢豈復定屬吐蕃耶彼不得所卽叛來此不得

所卽背去如此常事何乃固執復於國家何有朕豈利之
至如彼中鐵柱州圖地記是唐九徵所記之地誠有故事
朕豈妄言所修城壁亦依故地若不復舊豈爲通和蠻中
抄掠彼人勘問亦有此事緣其初附法令未行亦有姚蕩
邊人奸險求利或入蠻同盜亦不可知旣與贊普重親朕
又君臨大國正欲混同六合豈復侵取一隅再三已論何
乃不信顧慙薄德良用咨嗟且如小勃律國歸朝卽是國
家百姓前遭彼侵伐乃是違約之萌朕以結信旣淡不顧
其小中閒遣使曾不形言贊普何獨相尤而不思已西之

事所存既大當共成之近聞莽布支西行復有何故若與
突騎施相合謀我磧西未必有成何須同惡若爾者欲先
爲惡乃以南蠻爲詞今料此情亦已有備近令勒兵數萬
繼赴安西儻有所傷慎勿爲怪也朕心無所負事欲論平
但國家之所守者信鬼神之所助者順未有背道求福違
約能昌何況兵眾不可當而又天道所不假以此求濟不
亦難乎遠道所傳多應不實亦計贊普不合異圖故令人
審看定何緣也待潘息迴日更別具委曲今附少物具如
別數爲路遠不得多附春首尚寒贊普及公主比如宜也

平章事及首領以下並平安好今使內常侍竇元禮遣書指不多及

敕吐蕃贊普書

皇帝問贊普得七月一日信所言陰承本奏請不擬與彼和將兵馬大入者至如和與不和事皆由朕自斷何人輒敢奏聞何兵卽敢擅入所結親好不是近年文成公主已來亦重疊矣中間或絕或繼終是舊好存焉惟道此有讒臣不知彼專搆造亦須自覺豈可推過至如兵馬邊備彼與此同旣見彼處加兵豈此總無備矣疑自彼起不可相

尤近日築城不出疆界邊頭有要隨事修營何所致疑以此爲語如彼頻歲亦築數城若不惡心何故嚴備固是邊境常事不足爲言忽此相尤深所未達彼蕃必其自守此兵終不妄行所立盟約更知何用鬼神知意不必多言秋氣已冷贊普及平章事以下並平安好遣書指不多及

敕吐蕃贊普書

皇帝問贊普此使前至之日具知彼意寶元禮中間所云亦已備論且親以舅甥之國申以婚姻之好義非不重心豈合疑頃歲以來加之盟約此又不信其如之何至如境

上蠻夷元是眾物來不可拒去不可追前書已言想所知也而每來信使皆以爲詞或云越界築城或稱將兵抄掠且蠻卽背彼伊自築城城在蠻中人卽隨地所以侵竊亦是羣蠻皆在荒遐豈關處分而歸過於我無乃甚乎邊境小人不識大體此旣未免彼亦有之閒構旣行猜嫌互起朕近已知此贊普亦須察之勿取浮言虧我大信以絕兩國之好甚善甚善所有諸事皆具前書公主所請與人官及內人品第卽當續有處分春晚漸熱贊普及平章事首領百姓並平安好今有少物別具委曲至宐領取遺書指

不多及

敕金城公主書

敕金城公主歲月流易忽復經年言念遠情何能已已比者通好信使數來知彼所宜善足爲慰國家大計以義斷恩離別嬰心固當自抑仍善須和順使歡好如初所請授官及內人品第旣久在彼誠亦可矜卽當續有處分宗元禮衰疾近不能起賈混之緣此未得獨行待其稍瘳亦卽遣去今有少信物至宜領取春晚公主已下並平安好遣書指不多及

敕吐蕃贊普書

皇帝問贊普朕與彼國既是舊親近年以來又加盟約如此結固仍有猜嫌明知異域之心亦難可保比者所有信使惟知怨此相違自料國家何負於彼至於突騎施蕞爾醜虜頃年恃我爲援幸至今日而敢辜恩朕未卽誅之待其惡積贊普越界與其婚姻前者以意向道卽云尋已告絕朕亦委信以爲必然今乃定婚如初黨惡可見又莽布支西出朕具知之今竇元禮往彼問以何故又道別緣他事爲此遣還其人實將兵西向擬行攻取前後詐妄言與

事違驗在目前得不歎恨夫人之所以爲貴者以其有信
有禮國之所以能強亦云惟信與義若言不可信義不可
親雖在匹夫尚多恥愧何況君長能無情乎彼突騎施人
面獸心偏僻荒遠見利則背與親實難贊普昔朕宿恩共
彼相厚應非長策可熟思之又比來觀彼事意有殊往日
惟任計數以此爲能今與突騎施和親密相結託陰有贊
助而傍作好人如此潛謀亦非遠計所欲爲患不過邊庭
且邊鄙之於中國如毫毛之在身耳以彼戎狄侵我毫毛
雖實無多何須有損朕所以殷勤和好欲靜邊人君國之

心不能忘也亦與贊普累代舊親幸無大故不宐輕絕今邊鎮兵馬不可不防彼亦有之與此無別既不先舉自足知心從前所言豈有虛也秋晚稍冷贊普及平章事首領百姓並平安好遣書指不多及

敕金城公主書

敕金城公主數有來使聞彼安寧差慰遙心想所知也柔順之道旣以夙成終始用心貴於無失惟此而已餘不足言所附物並依領具有還答並更附少信物別有委曲至宐領取秋冷念比何似遣書指不多及

救吐蕃贊普書

皇帝問吐蕃贊普比亦覺彼事勢有異略加防備仍未益兵今得安西表來莽布支率眾已到今見侵軼軍鎮并踐暴屯苗先知彼有異謀猶未自將至此者且莽布支西出朕先知之前今問其行由得報自緣別事今乃爲賊負心如何安西諸軍去此萬里倉卒遇敵何暇奏裁旣彼交侵必應拒鬪倘有傷損可無相尤軍城鎮守之人不可束手就死事由彼起濩所咨嗟且累代舊親復新有盟約彼旣欺負天地違犯鬼神如此用心更知何道一往邊頭所備

只緣慮有非常今果如言防乃不錯突騎施異方禽獸不
可以大道論之贊普與其越境相親只慮野心難得但試
相結久後如何於朕已然義則合絕但爲誓約在近親好
又淡彼雖背恩豈我尤效先令奔問欲盡舊情必定爲惡
別爲之所一昨遣內常侍劉思賢送公主封物并每年國
信物見已臨路適會表來思賢此行量其在道遲緩今故
令劉思賢判官劉明子先行具宣往意秋冷贊普公主及
平章事首領百姓並平安好遣書指不多及

敕西州都督張待賓書

敕天山軍使西州刺史張待賓吐蕃背約入我西鎮觀其
動眾是不徒然必與突騎施連謀表裏相應或恐賊心多
計諸處散下鐵關于術四鎮咽喉倘爲賊所守事乃交切
已敕蓋嘉運與卿計會簡練驍雄於要處出兵以爲聲援
仍遠令探候知其有無自外臨時皆委卿量事秋令卿及
將士並平安好遣書指不多及

敕河西節度副大使牛仙客書

敕河西節度副大使太僕卿攝御史大夫牛仙客突騎施
連歲犯邊凶惡如此若不威服祇長寇讎自夏及今連歲

不散疎勒雖解邊城見侵雖無如我何亦爲邊所患終須有計以挫凶謀卿可於西河諸軍州揀練驍雄五千人卽赴安西受王斛斯部分朕當發遣十八年安西應替五百四十八人與彼相續足得成師若無斃勞何從息甲且此賊狂悖不論信義直肆凶毒其意已然不此加兵以圖撲滅使其驕暴豈有寧時已敕蓋嘉運與王斛斯審量事宜臨時爲計旣爲卿揆訪所管亦宜隨要指麾兼有別敕發三萬人此但聲援而已可大張威勢遠使震攝又恐安西資用之乏卿可於涼府將二十萬段物往安西令隨事

支擬及充宴賜朕則續支送涼府冬中甚寒卿及將士並平安好遣書指不多及

敕天山軍使張待賓書

敕天山軍使張待賓近知賊下燒此安然卽去竟無斥堠來不預知如此防邊無乃踈闊此一分頭抄掠計其數不至多向若烽燧稍明復與北庭計會相與來擊賊可無遺且邊鎮統軍俱受朝委共防患害何異一家況在絕漠尤宜相協已敕蓋嘉運訖可與之籌宜凶黨復來固須有預冬中甚寒卿及將士並平安好遣書指不多及

敕護密國王書

敕護密國王真檀朕知卿忠赤能保國境所以前加禮命用叶蕃情卿感此殊恩盡力外禦聞有凶寇能伸遠績以義動眾雖弱必強豈獨人心亦有神鑒朕用嘉歎不可忘也冬末甚寒卿及將士並平安好遣書指不多及

敕護密國王書

敕護密國王真檀發畝積惡自取滅亡想所具知不復煩述卿比者雖受冊立緣此未得還蕃彼既伏辜固無隔闕卿宣揚國命慰撫遠人保我西陲長守誠節突騎施凶悖

恣其抄掠卿宜善計勿令不覺其來已西商胡比遭發匄
劫掠道路遂斷遠近吁嗟卿宜還國必須防禁蕃中事意
遠路難聞可量彼權宜便與王斛斯計會夏末甚熱卿及
首領百姓並平安好遣書指不多及

敕識匿國王書

敕識匿國王烏訥沒莫賀咄卿比與護密相爲唇齒而發
匄凶狡劫殺商胡罪不容誅走投異域朕知其惡積改立
眞檀遽聞却來還占本國卿等讎疾頑暴相率誅之累歲
逋逃一朝翦滅永言忠義深所嗟稱今授卿將軍賜物二

百匹錦袍金鈿帶七事已下節級亦有衣物各宜領取夏末甚熱卿及百姓並平安好遣書指不多及

敕勃律國王書

敕勃律國王蘇沒謹忙得王斛斯表卿所與斛斯書知卿忠赤輸誠聞有外賊相誘執志無二又聞被賊侵寇頗亦艱虞能自支持且得退散并有殺獲朕用嘉之卿兄麻來兮及首領已下各量與官賞具如別敕今賜物三百匹銀盃銀盤各一衣一副並金鈿帶七事至宜領取夏中甚熱卿及首領以下並平安好遣書指不多及

敕諸國王葉護城使等書

敕諸國王葉護城使等突騎施不道連年作寇使我邊鎮
常以爲虞諸處攻闕所在堅守能伺其隙各有誅夷比卿
等赤誠臨事效節使祇不勝德氛祲自消遙料凶謀還慮
再下且賊眾烏合疲於重來勞則心離久必有隙卿等常
須有預以逸待之一二年間奇功可立富貴之舉彼賊是
資忠烈之懷此心可度今各賜卿衣一副聊慰誠勤所有
勲勞已令敘定當續有處分想亦知之春暄卿及將士並
平安好遣書指不多及

敕罽賓國王書

敕罽賓國王得四鎮節度使王斛斯所翻卿表具知好意然事在絕域不可預圖卿若誠心任彼量度事遂之日必有重賞朕每於遠國未嘗有所食言想亦知之勿致疑也秋初尚熱卿及首領以下並平安好遣書指不多及

敕日本國王書

敕日本國王王明樂美御德彼禮義之國神靈所扶滄溟往來未嘗爲患不知去歲何負幽明丹墀真人廣成等入朝東歸初出江口雲霧斗暗所向迷方俄遭惡風諸船飄

蕩其後一船在越州界其真人廣成尋已發歸計當至國
一船飄入南海卽朝臣名代艱虞備至性命僅存名代未
發之間又得廣州表奏朝臣廣成等飄至林邑國旣在異
國言語不通並被劫掠或殺或賣言念災患所不忍聞然
則林邑諸國比常朝貢朕已敕安南都護令宣敕告示見
在者令其送來待至之日當存撫發遣又一船不知所在
永用疚懷或已達彼蕃有來人可具奏此等災變良不可
測卿等忠信則爾何負神明而使彼行人罹此凶害想卿
聞此當用驚嗟然天壤悠悠各有命也中冬甚寒卿及首

領百姓並平安好今朝臣名代還一一口具遣書指不多及

敕西南蠻大首領蒙歸義書

敕西南蠻大帥特進蒙歸義及諸酋首領等卿近在邊境不比諸蕃率種歸誠累代如此況卿等更效忠赤朕甚知之頃者諸酋之中或有攜貳相率自討惡黨悉除即日蕃中應且安帖然則地臨外境亦須有預人無遠慮必有近憂卿可思之豈虛語也所有蕃中事意使者具知之比秋涼卿及百姓並平安好遣書指不多及

敕柘靜等州首領書

敕柘靜等州部落昨王承訓去緣當州百姓有相扇動故
令宣旨告示彼人如卿柘靜等州種落各異本自寧帖何
復爲言比者採訪使處置或未得所朕既知之已有處分
卿等祖父忠赤輸誠國家既是子孫久襲冠帶各守先業
是得坦然何所憂虞而云驚懼宜各遞相告語勿使更然
夏中已熱首領百姓並平安好遣書指不多及

敕西南蠻大首領蒙歸義書

敕蒙歸義吐蕃於蠻擬行報復又舊州鹽井本屬國家中

間被其內侵近日始復收得卿彼蕃落亦應具知吐蕃惟利是貪數論鹽井比有信使頗以爲詞今知其將兵擬侵蠻落兼擬取鹽井事似不虛國家與之通和未嘗有惡今旣如此不可不防卿卽與達奚守珪部落團練候其有動方可出兵必無事蹤亦不得先舉舊州相去道里稍遙若有驚急復須爲援並委卿與達奚守珪計會無失事宜卿於國盡誠在邊爲捍委寄得所朕復何憂秋中漸涼卿及首領部落百姓並平安好今故令內給事王承訓往一口具遣書指不多及

敕蠻首領鐸羅望書

敕故姚州管內大會長那傍時嫡孫將軍鐸羅望卿之先
祖輸忠奉國遽聞祖逝深愴於懷言念邊人必藉撫綏又
逼蕃界兼資鎮遏卿宜繼承先業以副朕心故遣宿衛首
領王白於姚州都督達奚守珪計會就彼弔慰便授卿襲
浪穹州刺史並賜綾彩三百匹至宜領取秋中已涼卿及
首領已下並平安好遣書指不多及

敕安南首領爨仁哲等書

敕安南首領歸州刺史爨仁哲潘州刺史潘明威獠子首

領阿迪和蠻大鬼主孟谷誤姚州首領左威衛將軍爨彥
徵將軍昆州刺史爨嗣紹黎州刺史爨曾戎州首領右監
門衛大將軍南州刺史爨歸王南寧州司馬威州刺史都
大鬼主爨崇道昇麻縣令孟耽卿等雖在僻遠各有部落
俱屬國家並識王化比者時有背叛似是生梗及其審察
亦有事由或都府不平處置有失或朋讎相嫌經營損害
既無控告自不安寧兵戈相防亦不足深怪也然則既漸
風化亦當頗革蠻俗有須陳請何不奏聞蕃中事宜可具
言也今故令掖庭令安道訓往彼宣問並令口具有不穩

便可一一奏聞秋中已涼卿及百姓並平安好遣書指不多及

張守珪奏裨將安祿山失利送戮京師批

穰苴出軍必誅莊賈孫武行令亦斬宮嬪守珪軍令若行祿山不宐免死

南郊赦書

門下朕獲主三靈於今一紀聽政中昃每不敢康觀書乙夜將求諸道頃年已來每思至理或遠人不率或嗣歲不登淳樸未還惕厲斯在爲人上而慙德奉天明以畏威故

祝史正辭必期於陳信郊丘備禮將俟於昇平今正宗廟
降靈克開厥後乾坤交泰保合太和麟鳳龜龍元符黃瑞
之祉蠻夷戎狄梯山航海之琬莫不日月以聞道路相屬
顧惟不德當茲休運欽若昭報疇咨故實所以今年獻春
恭祠后土季秋吉日追崇九廟採必先於魯經稽肆類於
虞典爰因長至欽謁上元告受命之元符昭嚴配之成績
大典云備至誠克展諸侯駿奔來於穆之相百神受職率
咸秩之文六變已陳三獻斯畢蓋春秋之大事莫先乎祀
王者之盛禮莫重於郊柴燎克終感慶罔極豈予一人之

福亦爾萬邦之賴宜因咸和之際俾承厚下之澤可大赦
天下自開元十一年十一月十六日昧爽已前罪無輕重
已發覺未發覺已結正未結正繫囚見徒大辟罪已下咸
赦除之其十惡死罪造僞頭首劫賊殺財主在不赦例就
中仍慮有冤濫者所司具狀送中書門下盡理詳覆奏聞
朕將親覽其有亡命山澤挾藏軍器百日不首復罪如初
敢以赦前事相告言者以其罪罪之升壇行事官及供奉
官三品已上賜爵一級四品以下加一階諸縣官並準此
升壇例內外文武官及致仕并前資陪位者賜勳一轉緣

大禮有職掌並押當者更加一階齋郎並放出身皇親諸親陪位未出身者並放選已出身者賜勳一轉親王公主各與一子官三品衛監門黃衣長上飛騎萬騎並仗內雜色人在齋宮宿衛及諸色人有資勞人緣大禮有職掌並流外行署預見大禮者亦賜勳一轉其充香爐執扇及禮生祝史贊者賜勳外簡日選優與處分兵士宿衛齋宮井諸色無資勞緣大禮職掌及京兆府百姓緣南郊祇應者各免其家一年雜科差南北衛將軍率中郎將宿衛齋宮者並同升壇例其諸軍節度大使及三都留守雖不陪位

委寄既重特宜同升壇官例百歲老人賜棉帛五段粟五石縣令至其家存問給付孝子順孫義夫節婦旌表門閭終身勿事已旌表者量加優恤諸州百姓或因逢水旱流寓未安者宜令所司與朝集使卽作賑卹安輯法奏聞其單貧衛士番鎮久次令州府長官簡擇灼然者放免番役征行人家州縣檢校勿使侵欺積西鎮人途路懸邈特宜賜勲一轉鰥寡憐獨亦令州縣倍加矜恤使得存濟元置義倉救人不足承前貸百姓糧及種子未納者並放免不得却徵自古聖帝明王忠臣烈士名山大川並令所管致

祭其已得替官人並輕累未得處分非老弱疾病猶堪處
事者量加收敘使免失職其左貶官非逆人五服內親及
犯贓賄名教者所司責勘奏聞量移近處其官人有清白
政術堪任刺史縣令及抱器懷才不求聞達者州長官其
以名薦宗室中有孝悌才術爲眾所知仍在卑任者委宗
正具以名奏君臣一體休戚共焉朕欽承天命恭傳大寶
蓋憑累祖餘業得一之符亦由羣公舊勲不二之力永言
繫賴其敢忘之自武德已來實封功臣知政宰輔有身無
大故而亾官失爵子孫淪屈者所由勘實具以狀聞存者

可疇其官榮逝者當錄其允嗣使幽明同慶知有今辰亞
獻邠王守禮終獻寧王憲各賜物一千匹捧俎申王撫夾
侍岐王範薛王業各賜物七百匹侍中源乾曜中書令張
說兵部尚書同中書門下三品王琬各賜物五百匹正衣
駙馬都尉王守一王繇溫曦宗正少卿崔澄各賜物三百
匹二王後賜物一百五十匹壇場使京兆尹孟溫禮賜物
二百匹修造羽儀使賜物一百匹修撰儀注官五品已上
賜物一百匹六品已下賜物七十段自餘陪位預宴官一
品賜物一百匹二品三品八十匹四品五品六十匹六品

七品四十匹八品九品三十匹鴻臚諸蕃使與見大禮及
在本蕃王侯大酋長並同宴會例給賜郡主縣主各賜物
八十匹緣大禮數處有職掌者任於一頭從高敘天下州
府賜酺三日京城五日任所在百姓村坊宴樂不得科率
聚斂其有處分未該者令所司及本使比類奏聞赦書日
行五百里主者施行

東封赦書

門下朕聞天監惟后后克奉天既合德以受命亦推恩而
復始厥初作者七十二君道洽跡著時至符出皆用事於

介邱升中於上帝人神之望蓋有以塞之皇王之序固可得而言也朕接統千歲承光五葉惟祖宗之德在人惟天地之靈作主往有內難幽贊而集大勲間無外虞守成而續舊服未嘗不乾乾終日思與公卿大夫上下叶心聿求至理以宏我列聖其庶幾乎馨香今九有大寧羣氓樂業時必敬授而不奪物亦順成而無天懋建皇極幸致太和洎乃幽遐率由感被戎狄不軌唯文告而來庭麟鳳已臻將覺悟而在藪以故凡百執事亟言大封願惟不德初欲勿議伏以先聖儲祉與天同功荷傳符以在今敢侑神而

無報大節斯在朕何讓焉遂奉遵高祖太宗之業憲章乾
封之典時邁東土柴告岱宗精意上達肸蠁來應信宿行
事雲物呈祥登降之禮斯畢嚴配之誠獲展百神羣望莫
不懷柔四方諸侯莫不來慶斯事天道之介福邦家之耿
光也無窮之休祉豈獨在予非常之惠澤宜其逮下可大
赦天下自開元十三年十一月十三日昧爽已前大辟罪
已下罪無輕重已發覺未發覺已結正未結正繫囚見徒
咸赦除之惟十惡死罪不在此限流人未達前所者放還
其有挾藏軍器亡命山澤百日不首復罪如初敢以赦前

事相告言者以其罪罪之內外文武官三品已上賜爵一
等四品已下加一階邠王守禮寧王憲岐王範薛王業各
與一子三品官公主嗣王郡主縣主各與一子官其應文
武行從官加階之外並賜勳兩轉三衛引駕細引黃衣長
上飛騎曠騎先有武散官者加兩階未給武散官者各賜
勳兩轉衛士馬主戎車主幕士掌閑供膳太常及仗內音
聲人行署及蕃官闕二並別敕雜色定名行從人亦賜勳
兩轉緣大禮登山闕三從行事舉脚等官三品已上特賜
一階仍與一子闕三已下特賜一階仍賜勳兩轉量與進

改其四軍別

闕二字

山宿衛及諸司上山執當官三品已上

賜爵一等仍與一子出身四品已下加一階賜勳兩轉亦量與進改其白身人及行署蕃官放蕃選其山下昇壇行事官三品已上加爵一等賜勳一轉四品已下加一階賜勳一轉選日稍優諸獻官及宿衛齋宮將軍率中郎並郎將並兩京留守諸軍節度使並同昇壇例諸有職守押當非昇壇例諸有職人加一階選日優量其加階應入三品五品人非特賜者並依十一年三月二十八日敕節限齋郎禮生見任官前資官已上人並依資量材與處分未出

身者放出身皇親別敕承恩陪位者亦準此諸州岳牧四
府長史朝覲陪位者泛階之外各賜勲一轉諸方使人及
諸州父老宗姓并從家子孫至岳不得陪位者並賜勲一
轉賜物五段諸州及兗州道僧至岳見大禮者並賜物五
段孔子後襲聖侯量才與處分天下致仕官各依本品賜
一季祿並束帛其陪位者仍賜勲一轉諸蕃侯王酋長來
會禮者各加一官至都節級並與賜物其入朝留在邊軍
人亦準此其蕃中祇候衙官刺史縣令並賜物及袍帶突
厥可汗小殺等諸國王守護塞垣歲月朝貢並宜賜物副

使將往侍老年百歲已上者版授下州刺史婦人版授郡君年九十已上者版授上州司馬婦人版授縣君年七十已上者版授縣令並婦人版級量賜粟帛其預見大禮侍老各別加侍丁一人孝子順孫義夫節婦旌表門閭終身勿事行人之家及鰥寡憚獨並疾病不能自存者委州縣長官倍加存卹諸軍行有文武散官已上者加一階白身者賜散勳一轉欠負官物逋懸租調並宜放免其行過州縣供頓勛勞並貼頓百姓有雜差科並車馬夫役者並免一年租賦兖州免二年租賦當頓官人始末不絕者與中

上考仍賜勲一轉朕永惟王業繫賴舊勲元首股肱其猶一體自武德已來功臣宰輔或名存王府遺嗣沈淪或身

無大故銜屈泉壤宜令所司訪擇申理唐

此處隆字避元宗諱

元年

六月二十六日立功官人往屬艱難能盡忠義今成大禮何日忘之宜各與一子出身無子者任回與周親之人有司試策三道等第收獎朕躬陟天門宿齋日觀時屬嚴冬雪後初夜風寒朕因露立祈恩誓欲代人當咎俯仰之際頓息霜飈奠獻之晨變同韶景誠荷上天垂祐亦賴靈山吐祥詩云無德不報宜封太山神爲天齊王禮秩加三公

一等宜令所管崇飾祠廟環山十里禁其樵採給近山二
十戶復以奉神祠率土之內賜酺七英華作五日任於村坊內
宴樂不得聚斂煩勞其節文有未霑及者所司比類奏聞
其封祠有數處行事者從一處敘赦書日行五百里主者
施行

后土赦書

門下昔者巡狩所至柴瘞斯行蓋取誠享以遵告類朕恭
承祖宗之烈獲主神祇之祀夙夜祇畏不敢荒寧故勒兵
朔陞先展義於汾社迴旆睢上遂有事於郊壇王者父事

天母事地漢氏祈穀未始正名周禮降神乃爲徼福而已
朕以天命之重子道爲先惟茲精誠在乎敦孝庶蒙福於
四海期永康於兆人是以率由舊章敬恭明祀嚴配之誠
旣展奠獻之禮又終且春秋之義大事在祀齋祭之福庶
品維祺豈獨在予而有斯慶可大赦天下自開元二十年
十一月二十一日昧爽已前大辟罪已下罪無輕重已發
覺未發覺已結正未結正繫囚見徒常赦所不免者咸赦
除之官人犯賊及有罪被推者本罪雖原不得更令却上
仍別與處分自先天已來有雜犯流移人等並配隸人等

各量移近處左降官未經量移及經量移未復本資者奏

聽進止天下遭損免州應損戶成詔令作減一分已上者及供

頓州無出今年地稅如已徵納聽折來年地稅逋租懸調

貸糧種子欠負官物在百姓腹內者並宜放免其不損處

一作免州自開元十七年已前所有貸糧種子負欠官物在

百姓腹內者亦宜準此諸州緣供頓所差貼助夫亦放其

家今年地稅孝子順孫義夫節婦旌表門閭終身勿事諸

州侍老百歲已上賜粟七石九十已上賜粟五石八十已

上賜粟三石所由速付勿淹旬日太原潞州府侍老等先

已加恩不在此例亞獻皇太子鴻賜物二千匹終獻慶王
澤賜物一千匹邠王守禮寧王憲薛王業各賜物一千匹
忠王浚已下各賜物三百匹夾侍正衣進珪捧珪汝陽郡
王淳等各賜物三百匹皇太子夾侍正衣各賜物一百五
十匹裴光庭蕭嵩弼亮朕躬宏益斯遠本有優異何殊等
夷加階賜爵之外各與一子官無子者任與周親仍各賜
物三百匹二王後各賜物二百匹長公主各賜物三百匹
嗣王郡主縣主賜物二百匹行從文武官三品已上賜物
八十匹四品五品賜物六十匹六品七品賜物四十匹八

品九品賜物二十段昇壇官三品已上特賜一階四品已下各加一階應入三品五品官階相當不限考數聽得入知頓使及判官修禮儀官撰玉冊文官知頓御史加一階修壇場州刺史及書冊官各賜物一百匹其已有昇壇職掌從頭處分緣大禮有職掌官賜勳三轉行從官首末不絕及陪位官各賜勳兩轉內外文武官三品以上賜爵一等四品已下各加一階致仕官三品已上賜物七十匹四品五品各五十匹行從蕃客鴻臚安置陪位見大禮者宜賜物五十匹節級分付南北衙應宿衛齋宮官及左右廂

知兵馬虞候總管已下及判官別奏兼孔目官等更加勲
一轉前資官選日稍優與處分白身人有資勞者簡選之
日優與處分無資蔭者賜勲兩轉南北衙行從三衛飛騎
萬騎引駕細引及監門直長主帥黃衣長上各賜勲兩轉
仍各賜物五段兩營弩一作弓手六番併行宦各賜勲兩轉
物五段仍量折番役諸衛彊騎及兵角弓手官馬主掌閑
幕士駕士供膳士供膳主習馭工人樂人雜戶官戶白身
有職掌人合行從人等各賜勲一轉物三段其齋郎既是
見任官準壇上壇下有職掌官例處分執彈三衛及禮生

贊者各減二年勞無勞可減者簡選日稍優與處分流外
行署從者各賜勲一轉有職掌者各賜勲兩轉供頓州刺
史同陪位官例始末專知頓官各與一中上考蒲州刺史
寶鼎縣官同昇壇官處分管壇一鄉百姓給復二年蒲州
侍老等準太原潞州例降一等處分武德初功臣每有大
慶必存追遠業參運始義合賞延其子孫沈翳無在朝者
宜令勘實卽與一子官唐此處隆字
避元宗諱元年立功官等艱難
之際誠效亦淡言念其初豈忘終始其三品已上各賜一
品官五品已上各賜紫金魚袋有亡沒者優贈一官仍與

一子官一子先得官者選日優與處分兩京留守京兆河南尹四大都督府長史諸軍節度副大使準行從官例處分諸方通表疏使人預見大禮準陪位官處分諸道戰人家仰州縣存卹不周濟者量事賑給諸軍健兒別敕行人各賜勲一轉仍令所司速勘會團奏官寫告身送付諸道行人或有身死被逃猶徵課役累及親鄰卽宜審勘爲其除削皇親中有文武才用堪任使者委宗正具薦當與獎擢五岳四瀆名山大川自古聖帝明王忠臣烈士輔相各令致祭務盡誠潔赦書有所不該者所司比類奏聞

命山澤挾藏軍器百日不首復罪如初敢以赦前事相告
言者以其罪罪之率土之內賜酺三日赦書日行五百里
布告天下咸使聞知主者施行

藉田赦書

門下昔者受命爲君體元立極未有不謹於禮而能見教
於人朕其庶乎有慙作者方冊存而可舉舊章絕而復尋
自古所行無一而廢將以上乞靈於宗社下蒙福於黎元
朕茲精誠天實降鑒今嗣歲初吉農事將起禮有先於耕
藉義緣奉於粢盛是所嚴祗敢不敬事故躬載耒耜親率

公卿以先萬姓遂終千畝謂敦本之爲小何布澤之更淡
宐有順於發生俾無偏於行惠可大赦天下自開元二十
三年正月十八日昧爽已前大辟罪無輕重已發覺未發
覺已結正未結正繫囚見徒咸赦除之其犯十惡死罪不
在赦限自餘死罪特宐配流嶺南遠惡處官典犯贓本犯
至死貶與嶺南遠惡左降官至流者亦量貶與遠官典配
諸軍効力計贓至徒仍不得重令却上天下諸州損免處
地稅先矜放其非損免處有貧乏未納者並一切放免京
兆河南府秦州百姓有諸色勾徵及逋懸欠負亦宐放免

其在官典及倉督等腹內者不在免限天下色役爰及支
用務令節減並諸州貢賦先令中書門下均融減省宜準
前敕速卽條奏損免州稅戶錢未納並七等已上戶租先
未處分及五色資錢課未納灼然不辨者並放至蠶麥秋
收已來贖納損免州逃兵健兒承前訪捉不獲合取籍人
充替自資裝送軍程期逼迫頗亦辛苦並放至蠶麥已後
發遣仍令所司預與軍州計會諸軍征行人並令州縣存
恤其行人有父母年七十已上者委本道採訪使檢責取
實牒報本軍卽放還本貫軍司據闕數募取健兒充替行

人及防丁有身凶者爲造棺槨遞還本處諸州應發遣防
丁去本貫一千里已上比來除正課之外給一丁充資多
不濟辦宜更量與資助兩京城內今年所有諸雜夫役並
宜免放應須使役以諸色錢和僱取充農桑是時不得妨
奪州縣長官倍加勸課孝子順孫義夫節婦旌表門閭鰥
寡惻獨不能自存量加優恤天下侍老百歲已上版授上
州刺史九十中州刺史七十已上上州司馬其九十以上
所由仍量給酒肉各令存問亞獻皇太子鴻賜物二千匹
終獻慶王潭賜物一千匹邠王守禮等各賜物一千匹忠

王浚已下各賜物三百匹夾侍正衣進珪捧珪汝陽郡王
淳等各賜物二百匹皇太子夾侍正衣等各賜物一百匹
裴耀卿張九齡李林甫自其翊贊誠有忠益頒賞以序等
數須優宐與一子官仍各賜物三百匹二王後各賜物一
百匹長公主公主各與一子官仍各賜物二百匹嗣王郡
主縣主各賜物一百五十匹在京文武官見任及致仕並
諸色陪位官一品賜物八十匹二品七十匹三品六十匹
四品五十匹五品四十匹七品六品三十匹八品九品二
十段節度使副大使三都留守京兆尹各一百匹四大都

督府長史諸道採訪使各八十匹諸賜物應兩給者從一處給其耕官及侍耕官各賜勳兩轉丞相蕭嵩與一子官仍賜物二百匹攝九卿諸侯等各與一子出身仍各賜物一百五十匹侍耕執牛官各賜物一百二十匹昇壇行事官修禮儀官及刺史判官等更賜一階應入三品及五品官階相當減四考聽入攝司徒信安郡王禕禮儀官韋縉既不敘階祿與一子官賜物二百匹縉與一子出身賜物一百五十匹其昇壇及修禮儀兩兼者從一加階應與一子官及出身者若無子聽迴與周親供奉及押階不昇壇

並壇下行事及助耕勒牛官別敕差中書門下差定人等
泛階合入三品五品官階至考未定者待考定日聽敕非
待考者賜勲四轉未承別賜者各賜一等知頓使賜物一
百匹修壇場長官屯官撰玉冊文官各賜物八十匹書玉
冊官賜物五十匹管籍田縣令賜物六十匹在東京文武
官朝集使外官充十道採訪使並判官諸道節度副大使
並諸方通表使諸敕使判官新除五品已上官未赴任都
城畿縣令見陪位者三品以上轉爵一級四品已下進一
階皇親諸親及九廟子孫不入等陪位者並外文武官九

品已上各賜勲一轉諸蕃入朝及賀正蕃客應陪位者共
賜物五十匹節級分付南北衙行從宿衛齋官者及文武
官押當有職掌並諸色雜職掌並應耕公卿從官等各賜
勲一轉萬騎及飛騎見當上者各賜勲一轉其宿衛齋官
者加賜物三段仗內坊侍諸色行從人各賜物三段曠騎
番兵角弓手弩手官馬主見當番及留帖人掌閑幕士駕
士供膳習馭工人樂人見當上有職掌並庶人應耕者各
賜物三段齋郎禮生贊者行事者並減兩年勞無勞可減
者齋郎放出身禮生贊者選口稍優與處分三衛七色見

當番並流外行署及蕃官見上有職掌者各轉一勲河南
洛陽縣陪位父老各賜物五段近壇百姓各免今年雜差
科宗廟致享務在豐潔禮經沿革必本人情籩豆之薦或
未能備物服制之紀或有所未通宜令禮官學士詳議具
奏朕自臨天下二紀於茲不敢荒寧日加兢業而災眚未
弭黎人未康若有由而然則在予之責有能直言極諫者
具以狀聞每渴賢良無怠鑒寐頃雖虛佇未副旁求其才
有王霸之畧學究天人之際智勇堪將帥之選政能當牧
宰之舉者五品已上清官將軍都督刺史各舉一人孝悌

力田鄉閭推挹者本州長官勘實有才堪應務者各以名聞致仕官久歷清資始終稱著年漸衰邁情有可矜量與改職依前致仕宗子中有才行著聞比尚沈屈者委宗正

勘實奏聞唐

此處隆字避元宗諱

元年兩營立功官任折衝並改與

郎將郎將改與中郎其亾官失爵量加收敘五岳四瀆名山大川及自古聖帝明王忠臣良相並令所在長官以禮致祭赦書有所未該者所司比類奏聞亾命山澤挾藏軍器百日不首復罪如初敢以赦前事相告言者以其罪罪之都城內賜酺三日赦書日行五百里布告遐邇咸使知

聞主者施行

卷之三

三